

## 論因果

### 因數

#### 一語不當 種一語之因

夫罹難遭劫之所由而然乎 我述之 爾聽之 我言之 爾記之 或可於未來之一切一切 不無小補焉 在同一之劫下 在彼則出 在此則入 彼出此入 應同而不同者 其非劫自異 其劫乎 此非劫有厚薄 而自異其劫 乃人各有數 數各不同 使劫不能不有所異也 數相異 固應變更其劫也

然在同一數中 在彼則應數 在此則脫數 彼應此脫 應同而亦不同者 其非數自改其數乎 此非數顛倒錯亂 自改其數也 乃人於數定之後 又造其不同之因 使數不得不有所改變也 是以大劫當前 欲知其免與不免 須自各索其數 不數當前 欲知其脫與不脫 須自各憶其因

明乎因之善惡 即知數之有無 知乎數之有無 即明乎劫之是否可脫 因善 數自無 數無 劫自免 是以明乎因 知乎數 而於劫氛紛繞之中 自能不急求逃避 以致徒勞其身 故智者不畏劫 只畏因 不逃劫 只免因 因之有無 數之結解 應劫者必劫 不應劫者必不劫 急避之無益於事 立待之無損於身 吾道每以鎮靜處劫 爲修者告者 並非故意使修者履險涉難

蓋欲數不應劫之修子 省其奔馳逃避之苦 數或應劫之修子 藉護道暢慈之功行 免其因 釋其數 以出其劫也 即或因惡數種 藉功行之力 不足以脫其難 而爲道皈道 爲慈殉慈 大善所在 吾 老祖豈能不加以超脫 加以超脫 自可靈有所歸 身得正果 雖云同一不幸 但視之極力逃避而仍不免於難者 輕重相較 何啻彼泰山而此鴻毛耶 是以殉道殉慈 不能謂其爲不幸 其與道無緣 孽因太甚者 雖欲果種泰山 俎豆千秋 百求之恐亦未必能得也

然則因之爲因究何云乎 恐爾坤方未必盡悉其所以然也 夫因者 猶之植物之佈籽粒也 籽粒良好 則其由花而實也 自亦良好 籽粒惡劣 則其由花而實也 自亦惡劣 籽粒等乎因 花實等乎果 因之良惡 即人之對人對事 意念 言語 行爲 之善與不善

惟意念言語行爲之善與不善 有出諸有心 有出諸無心 有自覺 有不自覺 其自覺爲惡 而故爲其惡 以致種因成數 因而招災罹禍者 無足論已 其不知爲惡 而陷乎惡

因而成因成數 以墮乎劫 豈不爲無妄之災乎 豈不更可惜乎

是以人之於人於事 當其欲言未言 欲行未行之前 必須格外考慮特別謹慎 及至既言既行 既成其思念之後 必須從頭回憶 逐件省察 何者有缺憾 何者不滿足 何者應急圖補救 何者應設法挽回 應救不救 不救即成惡因 應挽必挽 不挽亦成惡因 外而鄰里鄉黨 內而家族至親 一念不當 種一念之因 一語不當 種一語之因 一舉一動一行爲 如有舛錯 即種一舉一動一行爲之因 賢婦相夫 故應時自勉勵 時自慎重 而於自勉自慎之外 尤須對其夫子 勸其自勉 勤其自慎

現當劫網密佈之下 時時免其因 尤慮弗及 何堪再種其因乎 爾各坤方此後對於意念言語行爲 必須慎而再慎 力去其惡習 力改其惡性 退讓容忍 爲人之美德 在之女子尤爲重要 爾各坤方 力復女社之象 可謂須臾不忘乎道也 修道重道固要 而慎因免因尤要 其各細悟其所以然也

戊寅年二月初六日天津女社壇女社訓錄